

海

虞

詩

話

海虞詩話卷九

單學傅師白輯

翁學博咸封字紫書號濟虛乾隆四十八年舉人官海州學正  
振興文教值年饑力行賑濟活人無算時唐陶山先生仲冕方  
知州事極引重之將登諸薦牘舉爲卓異力辭之因有漆雕開  
略見大意柳下惠不卑小官之語先生予妻黨丈人行也嘗有  
游幕者告予曰可惜一箇好缺被翁先生做壞了訝問之則曰  
彼處舊習官惟與鹺賈往還爲肥潤計今但與貧士論文難乎  
其爲後任矣予寄丈詩曰先生官自冷此地水原鹹爲此發也  
丈卒後且十年正月朔旦予將起忽夢丈贈紫毫筆兩匣共四

十枝自是不禁有著書之意今叢雜至二百餘卷憾不能起丈  
於九原而質之詩不多錄以令嗣邃龔宮詹必將爲之刻集也  
計偕北上風雪渡沂云吳儂見慣好湖山平生不識行路難竭  
來駕車作游客敝裘耗衝朝寒前日渡淮風浪急今日渡沂  
風雪集沙深水滑跬步艱人馬同船各僵立水裏游魚水上鳥  
見影聞聲忽驚擾試問橫溪持權翁一生渡客知多少朝聞北  
岸車輪摧幕聞南岸馬蹏躓年年流水鳴不已寫盡行人愁怨  
懷我生本自惡羈束何事長途競馳逐風塵顏面真可嗤不如  
安住湖山曲婉折頓挫於起結呼應中卽可見其無競進意又  
瓶花歎云灼灼瓶中花可憐顏色好色好已離根芳非豈常保

人亟稱之謂別裁集翁格暮春詩莫怨春歸早花餘幾點紅留  
將根柢在歲歲有春風言有本之學可恃今翻轉說來用戒無  
本之學異曲同工矣

曾大令濟字勉耘乾隆四十九年進士知羅山縣植白蓮教匪  
弄兵民賴之以保後遷知甯化縣卒於官時稱循吏詩有梁園  
潯江淮南諸游草餉車卽事感賦云四家共一車四馬四家牧  
官差相招邀四馬同曳轂一馬當其轅三馬作驂服義取互扶  
持古風徵比屋馬力非不强叱之宜疾速四馬偶然集願羣未  
習熟四人更執鞭隨意加敲扑左之右或擊右之左偏蹴努力  
上潼關欲前反退縮前車已飛馳後車彌窘蹙人馬不相謀主

多令不肅挽推將伯助僂倖未顛覆負荷肩匪輕善馭操之獨  
君看大廈成豈由道謀築樊城旅次同顧東巖羅峻雲閒步登  
郭景純觀星臺故址歸途游小園買紅梅一株卽事成詠云襄  
陽郭外湘江濱舫聲軋車鞦鞞浮蹤至此經信宿云是山甫  
古城闌冬月晴明似春藹南行好與春光會艤舟斜日快登隄  
同人信步尋天籟彳亍芳原一望幽青翠交橫杜若洲回頭古  
觀臨孤嶼躡足層巔豁兩眸楚雲滃鬱蒸衡嶽神仙縹緲棲瓊  
閣洞庭千里浩煙波蠶叢萬里通脈絡當年此是朝元宮步虛  
隱隱凌天風景純學仙去何所但聞墟墓留江東憑高弔古發  
三歎下循曲徑過碕岸野梅露影竹籬深梅萼舒紅香未散去

年入洛逢春回春回不見梅花開此行還未渡江去春氣先渡  
江濱來小園相對徘徊久異地分明遇良友攜得名花載畫船  
憑君一路催詩酒佳句如謀生餐字蠹浪迹剖瓠尊送迎山變  
態沿溯浪回頭每因知懼終无咎豈曰能勞我獨賢其節概亦  
可想見

邵大令培惠字元直乾隆四十九年進士選甯國府教授遷知  
麗水縣叔六太史哲嗣也承其家學工於駢儷之文詩亦清妍  
有享帚樓集十二卷其女夫歸肇行手錄者立暢樓云高樓百  
尺拳飛星後倚硯碕前清冷云是梁時太守之所建公餘嘯傲  
危欄憑光景流連傳八詠長庚婺女韜文明隱侯本是江東秀

藉甚聲華冠朝右當年編纂收散亡不僅襄陽傳耆舊彪炳成  
書布國門蕭姚真覺瞠乎後卻恨詩篇未絕倫肥辭瘠義劇紛  
綸宣城五字當時俊樂安駢語到今新等身著作縱兼擅終慚  
奄有二子成三人况是斯文有天籟揮灑何用宮商勻靈均以  
還祕莫覩此論千古局迷津雌霓連蜷亦淺耳何勞擊節誇王  
筠吾來名郡展游眺帶減腰圍緬風調淡淡林閒翠靄橫沈沈  
天際明霞燒覽勝懷賢發浩歌虬蟬撼樹應無誚論高氣逸不  
減朱查一輩人也茶船九首末爲舟中茶船其題頗新詩云渴  
來團月漫相求便有星槎入小舟宛似鏡中還照鏡卻如樓上  
更登樓茶經泛影宜兼載茗戰拏音若共流猶記雕鏤桃核巧

松風魚眼在脩頭

江上舍熙字蘊明喜賦遠遊嘗與毛寶之同客雲南趙州師荔  
扉範處予得其甘白近草二紙鮑銘山加墨皆五律也氣味頗  
靜深桂村道中云羊裘蒙霧露鴟杖走霜風江樹微茫裏山城  
隱見中客懷愁薄暮冷氣苦衰翁役役何須問吟詩例得窮解  
悶云歲暮未歸客堂空獨坐時野人憐閉戶穉子笑吟詩高谷  
雲常合寒檐冰倒垂若爲解悶事濁酒酌深卮鮑評謂其妙得  
真境非妝點家所能辦良然

張布衣碭初名士才字方成號杏村家橫涇著有淡雲集四卷  
銀髻偉貌多所覽誦書工華亭體通醫理數術而尤嗜詩能爲

大篇纒纒不窮差未持擇耳以教讀自給年過八十古風如陶  
容齋枉過論文別後寄詩云索居塵壤閒終歲受拘束朝夕閒  
讎校疑義滿胸腹仲冬越三日晴窗展書讀良朋飄然來行歌  
入書屋相顧笑掀髯如貧獲金玉煖茗坐深談慷慨憤時局紛  
紛蠅聚羣簇簇蠹啜肉聲色擾我前不堪寓耳目太息姑真之  
信古企遺躅竟日細論文闢發胸中宿孔孟道卓然日月光四  
燭文以名理勝一貫旋機軸其次則典制采摭紛百族才以學  
控縱不才就庸碌學以才組紉無學墮汗漬才學本無分其妙  
在精熟工夫到手來左右從心欲追思壯歲時鉛槧三冬足舊  
學欺浮沈六十流光速對此殊激昂世途困榮辱何堪被謗傷

種種顛毛禿同調爲悚然各各盡衷曲紙牖夕陽紅行色遽相  
促送君河之湄髮白流水綠攜杖返書齋青燈照幽獨此老自  
抒所蓄人與詩共傳矣詠虞山古迹二十餘律格調高壯余喜  
其吳王廟云霸圖贏得一荒祠春去春來有所思樹上鳥嘯悲  
伍員階前花落哭西施吳歌越舞煙消處綠水青山夢醒時滿  
壁紙灰飛不起年年遺像掩塵絲新秋夜坐云大火西流暑漸  
平軒窗露坐觸吟情風來曲巷神俱爽月到中天影倍清庾信  
文章悲晚歲莊周夢幻悟浮生螻蛄聲裏驚秋早天地無私節  
序更紅梅云冰雪叢中發豔姿認桃辨杏亦隨時別裁宋璟禮  
華賦潤色林逋冷淡詩到底清高神不俗豈因妍麗格旋卑天

心特爲寒香惜一樹輕紅破例施皆體骨堅強拔俗之作又戲  
題放生會册云推廣仁方博愛同舉頭隨處見陰功雞鳴犬吠  
雲霞表魚躍鳶飛化育中祝網存心開一面銜環無意到三公  
白鬚撚斷捐詩助欲向滄溟放蠹蟲趣甚佳句如杭州小有天  
園云徑曲花爲地園深樹作天美人風箏云紅顏薄命真如紙  
白日飛昇不是仙和梅花杖云羅峯掣斷無根夢灞岸扶來有  
腳春不倒翁云旋向動中求鎮靜轉於危處獲平安白桃花云  
淡雅全無輕薄意清真饒有室家風皆善烹鍊子倬字漢昭習  
醫亦喜吟漫興云有興每思杯似海無聊真覺日如年蓋綽有

父風云

徐武生涵字有容號仲米少受詩法於王柳南彈琴舞梨丹青  
音律皆所究心後以豪俠憤事除武生名老益耽吟有湘雲小  
草贈悟無和尚云病足栖塵外跌跏澹俗緣山因能靜壽樹藉  
不材全泣鬼詩鐫竹談經舌吐蓮客來常不送多事笑溪邊以  
病足貫注通篇有力訪韓梅坡於月聲庵不值云十年臨頓別  
茲復訪精藍僧笑塵緣幻僮誇舊姓諳隱蹤仙佛擬書法晉唐  
參不耐微疴染山梅失共探友人古劍次韻云示我英雄器猶  
懷古壯圖倚天迴鳥翼投水斷蛟顛直費千金否橫磨十萬無  
囑君堅韞匣休遲逐蠅粗故栉行贈明經姪蘭友云梅林老杏  
巨如屋蔭覆平原鳴跼綠栽從南宋歲月長海虞古木羣推獨

距杏僦東村名徐我家中葉分支居村頭鬱鬱矗古栝鞦韆擁  
厓柯欒如苔皴斑剝瘦暈節礫砢角撐鬼睛裂豕腹膨脝蛟頸  
昂殊形俶詭色黑鐵故老莫知初植年約略與杏爭後先拳枝  
蔥蒨蓋衡宇靈氣磅礴鍾才賢翩翩小阮自拔俗棟梁偉器振  
衰族文能騷賦術壬奇武嫻騎射韜鈴熟習書葉摘霜初紅攀  
枝繫馬嘶寒風春秋把卷斯樹底觀光有志朝宸楓我常過訪  
愛樹古摩挲話舊揮松塵或仰碧葉覆如幪或餐丹實甘於乳  
枯榮異致總耐看雪鬢雨溜根蚪蠕鳥不敢巢蟲蟲絕多陰且  
壽風月寬遙望古杏同聳壑近庇吾宗無凋落庭槐樹德事可  
符干雲佇看基能拓體仿杜韓結構完密殆矯然拔俗之品也

聞周介石自桂林歸云周家季子志誰如欲洗澆風返太初四  
海孤蹤三尺劍一身俱膽萬言書桂林拂熱辭雲瘴琴水吟秋  
臥草廬屢阻病魔難嘯晤空懷松月夜窗虛第三四句說盡介  
石過春申江弔古云莽水猶傳公子名峭帆穩渡意難平弱人  
失戒謀何忽強國生歸智亦明珠履三千羸趙勝劍鏖五百愧  
田橫爲憐結客當時意長揖煙濤醉一觥武林寓齋望遠山云  
牆外花飛春可憐苔茵小立聳吟肩山城一角青螺好粉本如  
披郭恕先佳聯如海鄉云旆矗城遮市桅攢島泊舟野橋云沽  
酒通村徑尋梅過逸人和劉白崖云筆底風雷捲胸中湖海吞  
答周少霞云使慣英雄酒羞稱兒女詩雅集云摘梅傾蕘酒削

荀和蒸豚答潤亭云脫帽疑顛旭登舟學笑雲過太倉云衰年  
已悟逃名是浮世何知浪迹差壽馬澹翁云漢書讀久頻浮白  
晉帖臨多費硬黃平山堂云平遠有誰懷宋代繁華無不羨揚  
州太湖云螺點洞庭青兩岫盤形笠澤白三州才氣頗足自豪  
也

邵文學廣鑑字始舟一字平父元直大令次子學富行端讀北  
史小樂府三百餘首其從子淵耀跋云義取直書旨協微顯屬  
辭比事法本陽秋茲摘十首餘選入大觀集齊文宣云雌懦性  
不了那得如龍虎抽刀斬亂絲拭鼻登九五周千金公主云飄  
流入異域宗社亡偏酷慷慨屏風詩不類烏孫曲崔浩云伯深

實奇才纖妍似美女自擬過張良空懷赤松侶甄琛云耽棋夜  
不止執燭慚奴詞假書許赤彪乃竟爲帝師傅永云上馬便擊  
賊下馬作露布年踰八十翁矍鑠諱言暮酈道元云善長水經  
注造語奇且工臨難叱賊死大有銜鬚風祖瑩云文章有風骨  
自然出機杼偷任與竊沈或未聞斯語徐之才云能解紫纒鞵  
偶披紅眠帕首倡禪代功亦作徐僕射苻承祖姨楊氏云姊有  
一時榮妹有無窮樂內外號癡姨呂嬰智不若文苑云學者如  
牛毛成者如鱗角太和天保閒詞苑最卓犖

王文學清蘭字遠亭喜任俠詩學新城登廬山云一上巉巖一  
放眸青山笑我數來游風迎絕壑幽篁嘯石漱層崖瀑布流穿

過白雲方見寺聽殘黃鳥又登樓憑欄更擬酬遺逸衰草斜陽  
下古邱頗有神韻而窮愁供冷態多病折雄心一聯予尤愛之  
今壽已八十餘

張明經大鑑字友柏幼慧早掇芹香旋食餼輸貲敍縣丞仲絜  
侍御敦均子也喜購法書名畫如恐不及終以此受困遊冶風  
流中世而卒秋曉云愛月眠最遲愛秋起最早薄雲淨高空孤  
煙散清曉披襟步中庭爽氣入懷抱霜染一籬花露浮三徑草  
耽此物外賞適諧靜中道慮淡世味寡性僻交游少俯仰天地  
閒此身閒是寶題春泉濯足圖云春空盪晴雲春泉漱鳴玉伊  
人坐苔磯臨流欣濯足楊柳閣清陰菰蒲泛餘綠脫屣謝紅塵

自理滄滄曲皆去王韋不遠夏日云乍晴人意爽翠色入池塘  
新竹梢微雨殘花鎖夕陽鳥聲簾外細書味午餘長一榻真清  
絕悠然燕妙香殆胸無塵坭也

錢上舍受鴻字仁夫夜泊龍江關云歸心此夜似奔瀧偏值巖  
關阻客艫只有夢魂攔不住乘風早已度龍江頗有逸致

華明經庭桂字詵一詩尙風致蒹葭橋春望云二月輕風舞柳  
腰支筇此地興偏饒草香花暖濃春裏人在婁東第橋風亭

水榭護輕煙石浦回波漾碧川匹練繞花春書永玉人斜立畫  
樓前春潮斜擁木蘭舟文筆名晴雲水面浮一曲滄浪歌未闕

簫聲何處夕陽樓沿隄芳草正婆婆拾翠佳人倚棹歌見說界

溪春水漲黃鶯聲占綠楊多子會昌字慶霄弱冠領嘉慶五年鄉薦早卒亦工詩稿燬於火

朱明經景周號秋坪居羊尖市南少喜臨池家有良田千畝每冬日輸租者至各書楹聯予之數年書法大進由董文敏入米南宮後遂泛摹諸家以趙吳興爲歸宿至老不倦詩有雅度漫興云小齋如舫對清溪讀罷南華日又西風捲濤聲欺樹偃雲移峯影壓檐低葛衫涼意先秋覺紈扇新辭爲客題更有閒情學垂釣柳陰驚起睡鳧鷖此詩嘗索予和予有云延月入窗移榻近積書連屋怪檐低蘇黃妙墨拈毫傲劉白清詩擊鉢題皆實錄也尤愛其夜雨一絕云入夜空階響不停熟眠僮僕喚難

醒關心獨抱新年意一枕雞聲帶雨聽真老農語足令人思稼  
穡艱難也

趙文學同鉅字良伯號子梁詩宗王次回袁隨園兩家故多七  
律錢東澗遺宅弔柳如是云不須青鳥爲傳音親把虞山一老  
尋收拾衣香辭北里安排文字入東林白頭自遁空門迹紅粉  
孤懸舊主心祇惜聰明雙俊眼識人未抵愛才深手拂蛛絲展  
畫屏風流大令爲開扇推窗宛轉迎花月照屋依稀識柳星可  
有履聲來橐橐別將粉本繪亭亭小朝廷付滄桑久幾級瓊梯  
地轉靈案東澗遺宅今爲昭文縣署宅內東偏有柳絕命之樓  
門常扁鎖邑令劉元齡啓而掃除之繪像懸焉因有是作

鄭文學德懋字應雲號聞箏道人天姿奇拔博古有文人皆歎

其不偶於時題毛子千友紅詩草云俟老篇章迴出塵高原宿

草幾經春友紅又發新聲好絕代吳猷得替人

俟菴先生有吳猷集君其姪也

青山碧水繞階墀秋月春花照酒卮莫道吟編都寫盡通靈還

有畫中詩

子千

工畫老斲輪手也惜未見餘篇

許二尹廷誥原名景誥字八兼號小漁以諸生充國史館謄錄

議敘選都昌縣丞書學淳化帖工行草八分詩亦古雅暝色云

煙中蝙蝠飛暝色上征衣漸覺別離遠相看風景非清波日以

闕芳草日以肥臨風羨燕燕日晚歸柴扉項王墓云想見哭同

聲當年會穀城英雄心肯死公禮葬何輕市近弔車便魂歸劍

氣橫一碑能立懦情重魯諸生又題桃源圖有漁郎到底曾來  
否問煞桃花總不言之句吾師席麗農先生極賞之

姚文學文起字次韓號柳堂古愚文學子也詩承家學刊有支  
川竹枝百首并七律二卷餘尙千首中年疾亟自謂未工命家  
人悉焚之予僅見竹枝向已選入大觀集今再錄二首棉田削  
草踏弓鞋夫壻前頭步步偕著意日中雲片起儂家新樣喫雷  
齋染布如飛棹不停岸頭閒立話娉婷裙襦顏色隨年紀少愛  
桃紅老佛青案染布船乃外來者

陳文學向榮字春巖貌靜神動喜覽卷帙常欲盡購沈文愨公  
別裁所載諸先輩集著南沙雜詠百餘首自注故實有足資考

證者贈鮑五吉卿二首云鮑君酒既酣抑塞向我語當代數人  
才述之不容縷大兒孔文舉小兒楊德祖餘皆董龍輩孰是乃  
公伍吾聞殊不然君言何太詡人各擅所長方員異筐筥人各  
效所長考擊應鐘鼓雲龍韓孟交千載得所與君試瞻天衢豈  
乏同心侶又去歲白門游經旬同聚首君志薄青雲君才冠曹  
偶然而意所激忤者什八九干將非不銛斂鐔乃能久趙璧非  
不珍韞匱庶有守遠怨詎無由責人躬先厚高明濟沈潛勿使  
口戕口願進逆耳言君毋掩耳走三復白圭詩當筵且飲酒詠  
金魚云青花瓷盃排空庭非華水注雙銅瓶澄波微翻漾碎錦  
堂堂策策聲能聆飼之子下既果腹游泳趣足機無停吾聞水

族極繁瑣巨者亦復通神靈噴水爲雲致風雨吐氣成沫奔雷  
霆會稽得免任公釣掉尾不見終冥冥茲魚雖小具文采紅章  
白質紛瓏玲幾同鮒魚資尺水一勺之積難爲鯁何如翻然鼓  
浪去暮遊北海朝南溟佳句則村居云人呼陳仲子我慕漢龐  
公壯歲云閉門且讀英雄記插架無妨貨殖書自述云非甘貧  
賤才原拙得際昇平福自多皆見英爽之概而持贈尤多切實  
語張子恂過訪云人從嶽色河聲老字訪秦碑漢碣全贈吳瑣  
儒云澄懷豈以高明累絕識多從辨論生憶單師白云獺祭緜  
書多辨論雞談跋燭妙詼諧鮑吉卿名傳諸生性敏捷好罵座  
張子恂名夔熟於碑版流寓湖北不恆歸吳瑣儒名卓信亦諸

生博學善古文皆里中知名之士

吳大令耿光字觀文號柏香乾隆五十四年舉人大挑分發安徽攝宿松縣因銀虧獲譴歸苦寒云不道凌寒骨而今亦畏寒朔風吹急雪裋褐戰雙髓酒力隨杯盡冰痕帶日圓那堪行旅客夜半已雕鞍寒朝病起云亦戀重衾暖難禁病骨酸攬衣新褐重束帶舊鉤寬葉落疑庭廣霜濃誤雪看閒階聊小立凜凜怯晨寒兩押寒韻皆清妙又偶成云望到未來終是幻事從過後漸知非燕子磯晚眺有一天空翠下漁竿七字配亦能詩

錢文學大論字秀峯無錫人寓羊尖市南六七年予從之學文才思敏捷左頤偏削嘗酒後朗吟云自喜文無敵人嫌面不方

骯髒可思也游綠稼橋口占云西日餘暉挂柳條陰晴未定熟  
梅凋萬蛙聲裏秋齊插爽骨風吹綠稼橋偶聞而默識之先生  
無詩稿也

僧妙海字彙源號暉山又號乘桴題許吟亭師畫竹云雨過絲  
簾淨風飄墨瀋香偶然看翠影卽此悟清光天拂雲梢迴煙凝  
露葉涼一枝如可折留取證空王

僧眞靖字雪林一字孤嶼號幻存又號硯圃出家梅李寺康明  
府基田嘗招之主承光園善畫菜用烘染法亦能詩東塔書懷  
云野鶴行蹤何處尋廿年瓶鉢寄梅林半樓雲接青山迴三徑  
霜團絳葉深夢破曉鐘清客思興隨飛錫淡禪心憑將籬菊酬

佳節靖節詩堪細細吟後四句寄意微妙

項節婦吳靜字定生自超文學女家任陽年十八適項肇基三年而寡自縊以救免又二年姑歿絕食七晝夜不死復縊幾死矣仍以救蘇及夫弟婚以疾卒性喜觀資治通鑑教弟卓信甚至遺飲冰集一卷自序言不過自適己事以當痛哭深秋夜坐云颯颯西風起深閨獨坐慵一身驚隻鴈滿耳逼寒蛩庭竹蕭蕭冷鑪香冉冉濃孤燈聊伴我心事歲寒砵聞絡緯有感云何處傳來杼柚聲蕭蕭籬落最關情頻縹煙縷寒空靜苦擲風梭夜氣清憐爾織成秋一片教儂腸斷月三更商颯颯吹來急此夕誰知短夢驚哭姑云憶從夫壻歸泉後幸有吾姑可告哀

不道吾姑拋我去可憐寡媳倚誰來一身盡是愁腸結半世何曾笑口開五十年光豈已足西華揮手若相催皆足自抒其志絕句尤有鐵骨錚錚語已采入大觀集矣

張孝女蘭森父應昌早卒許字陳年二十以母病未嫁刲肱不效乃先肖己像籲天誓代題詩以祈必應既而身死母愈乾隆五十八年事旌表綽楔在西鄉河陽山之讓塘橋詩云髮膚身體本親遺代死何妨任女兒割肉未能除痼疾存根惟有計摧枝堂前萱茂兄加護地下椿靈我獨隨料得此行天肯聽焚香灑血敢陳詞其兄深出此徵題士林詩文成牛腰大卷徐恭者亦邑媛也題云婦行常從不幸成女惟一死振闈聲旌題絕勝

膺鸞誥事不因人自得名意致絕佳別無所傳因附錄焉

海虞詩話卷十

單學傅師白輯

言太守朝標字起霞號皋雲乾隆五十四年進士由主事升郎  
中歷知夔州保甯柳州鎮安各府工書能得閣絳諸帖神骨詩  
體清華送朱蒼湄同年卽次留別韻四首云共是名楊落拓人  
當歌對酒意相親官因少事何嫌嬾交到忘形始覺真薇省分  
題同屬稟豐臺聯騎記尋春安仁怪底興歸思留得蠻箋十樣  
新無多同調住京師正是愁添萬斛時是時同年  
歸者六人聽雨那堪離  
別近過江翻恨結交遲悲秋心事吟蟲訴念侶情懷斷鴈知南  
望雲山是征路郵亭怕聽柳枝詞俯仰因人似桔槔一官局促

笑吾曾從知索米謀原左解賦歸田識便高去路菊英迎客展  
過庭草色映春袍黃山白嶽君家在好紀游蹤掃月毫祖袁才  
望動公卿珍重當時月且評文士自來先器識少年難恃是科  
名佩弦便當千金贈加飯休忘萬里情卻笑欲歸歸未得別君  
那禁旅愁生佳聯如報葉大云文人原善病秋士况多愁病夜  
云頻年京國懷人遠五月江南夜雨多贈陸景雲云夜雨裁詩  
花骨細秋風善病鶴肩臞寓維摩寺云日來海島紅成暈山入  
江天碧欲無又山骨恰如詩意瘦溪聲便當佛言聽皆名士吐  
屬也

胡孝廉鳴謙字畏盈號吉山乾隆五十四年舉人文藝一時推

邑中之冠及門多至數百人兼工駢體未得其遺集但見題張  
孝女蘭森詩四章云舍生以取義吾聞諸孟氏殺身以成仁吾  
聞諸孔子人讀孔孟書偷生猶避死噫嘻彼丈夫愧此女子矣  
張氏有孝女父歿母在堂泣夫母致毀侍母女悲傷廁諭必手  
滌湯藥必親嘗醫窮冀神佑一炷焚心香祈神神弗應剗肉亦  
無補祈神神忽格籲天乃得許女死女自甘母生母勿苦九泉  
得所依膝下瞻慈父嗟哉純孝行誠至能動天至奇實至庸可  
敬必可傳世儒談節義臨事輒諉焉由來忠孝心巧喪而拙全  
瞿文學青垂字竹香喜覽書耽愛師友性有含蓄收輯先世手  
澤不遺餘力所著筠碧山房詩不落輕佻時派雖有厚皮饅頭

之嫌然未失晚唐模範也讀徽欽南燼錄成樂府百穴珠云古  
人稱珠貴照乘照乘之珠以光勝未聞大珠產小珠珠珠相引  
靡窮盡契丹有珠號百穴穴內含珠圓且潤此爲珠中希世珍  
連城之價奚足論第是物寶非國寶不能保世遺子孫延禧因

虜追此珠珠玉爲寶殃及身

按契丹主耶律延禧云吾祖真宗  
有百穴珠一顆大如雞卵凡百穴

穴有一珠月夜以珠映之珠自落每月可得百珠吾國爲金所  
滅此物不知所在今北國拘執追訊此珠未得釋去詩旨重人

也奴婢辱云五把麻不可縫五斗稗不可舂王孫公子諸貴族

裸其體兮枵其腹生既不可死不能爲奴爲婢遭荼毒君不見

宣和政以華靡底公卿子弟皆輕肥侈於玉食錦綺衣

按靖康  
之亂陷

金者貴家盡沒爲奴婢使供作務一月人支稗子五斗春米一  
斗八升爲糧歲支麻五把緝爲衣男子不能緝者恆裸體或哀

之使執爨雖時負火得煖氣然纔出取柴師坐火惟南燼紀聞  
邊皮肉卽脫落不日輒死詩旨戒貴族之侈靡也

一書周密曾斥爲僞妄竹香殆未見齊東野語故詠之耶抑聊  
借以資諷諭耶集中此爲佳作故摘焉其他如春寒云柳眼封  
微雪山腰鎖凍雲北村云樹裏湖光白帆邊日影紅壽吳竹橋  
師云文章歸道義金石當經綸皆佳

邨明經談字蘭坡更名掄達號鐵蘭道人畫書詩懸鄭板橋以  
爲的冷僻不滿於士林其詩清飭無塵與庸庸迥異論畫一條  
云落手時先敲定主意通幅乃一線穿成山勢平削用提頓山  
形散漫清出落攻透反面發揮正面層層清切處處空靈謂之  
結構從來大家不曾野戰玩此可知識力也答贈陳漁翁集桃

花源記字云不道花迷路閒行良有緣近村欣得酒絕境自通  
船林盡皆爲水山平便是田及時窮也樂扶病欲來前忽見山  
開朗人家屋向陽夾溪花自落迷路草初芳有地皆通水無村  
不種桑欣然來問訊遂與世緣忘聞說桃源口從前爲避秦至  
今欣欲往不復歎迷津日遠出隨水山閒來向人相要設酒食  
世外論交親客中集歸去來辭字云風日盡成趣及春胡不歸  
雲光迷岫遠松影入窗微已悟身形役休尋世是非交游請息  
矣心羨鳥孤飛惆悵迷途遠而今悟樂天撫懷時有得所向欲  
無前庭悅知春鳥窗飛就壑泉吾生悲役役徑欲自耘田贈單  
師白時方輯海虞詩話云老絆身家果交游悵各天我還窮世

俗君已隱林泉萬卷書經手千秋擔上肩前修半凋謝回首一  
茫然酒後試羊毛筆云福命惟吾薄疏狂不汝瑕全拋身外事  
只看眼前花好讀書多忘常行路慣差酒家新認得賒後又重  
賒又身在詩中老心從酒後寒賤極自憐還是士悟來何必便  
爲僧無求不覺人情薄過傲方知客食艱老態暗催人不覺故  
鄉久別路如生乞食云莫言一飯無消息從古原無不餓仙觀  
棋云莫笑持匱太爭競機心還未出棋盤感懷云莫說閒居無  
事甚世閒多事只緣貧諷誦之餘清風起於齒頰臨終前三日  
猶爲人畫梅題詩云收拾前生帶來物一包清氣不成擔然則  
其生亦有自來也詩刻有數種又著虞山畫志行世

吳參軍燾基字子洵槐江制軍猶子乾隆五十五年以商籍入  
浙江仁和學曾游晉衛齊魯燕趙之地詩法得之青浦稷堂白  
華兩先生發源昌黎古風偏奇多使難字然非小家伎倆也離  
石曉發留別諸公云曉月落層嵐朝暾上危岫盤礴氣空濛微  
風拂輕袖兩載此栖遲三多少成就縞紵賴同人芝蘭幸合臭  
奉世雅投壺晉卿胸列宿緩帶薄牙璋寒甍成綺繡方思載酒  
遊矧復官曹僦冉冉忽睽攜怱怱等邂逅聚首良獨難分襟偏  
覺驟東門憩油幢南浦綰離綬蒲策贈將盈羽觴苦相侑落花  
舞離筵飄絮撲清酌相顧各沾衣欲言愁靡究結纓暫徘徊惟  
念多糾繆山色壓愁濃樹態傷離瘦游子本浮雲客心若奔溜

跨馬立蒼茫，願望殊悵。韓信嶺，平陽道絕磴危崖。  
百折盤盤上青雲，倚蒼顛長阪紆迴。乍坦平四山，岌嶮仍環抱。  
當年國士本無雙，奇兵突擁威名早。幾隊旌旗卷赤霞，千秋騶  
駘迷芳草。轍迹人愁行路難，鞭絲我當看山好。君不見山巔廟  
貌煥嵯峨，少年寄食曾潦倒。聞蟲云大有江南思，莎蟲得露鳴  
幾年縈客夢。此夕警秋聲，草密藏身穩。風微舉翅輕，三更梧樹  
月彷彿。故鄉明故關，道中路頗險峻。山圍萬仞澗，瞰千尋村落。  
雲連窰房鱗，比詩所謂陶復陶穴也。隔山遙望儼若畫圖。馬上  
賦此云傑閣雄關逼上台，遙看隔嶺似樓臺。人從屋底穿雲出，  
山向檐頭壓翠來。紅樹幾村秋澗遠，錦屏廿里畫圖開。遺風陶

復傳千古愧乏登高作賦才甯鄉春夜云四面春風綠入城  
中春轉不分明儘多蓬梗園茅屋絕少楊花撲繡楹落日虎驕  
門早閉空山人遠柝無聲幾回夢到江南路已是嘯殘出谷鶯  
皆壯傑自喜又與單協唐先生野步云隕籜寒野空秋林耿疏  
影嘉禾收上田蒼松秀高嶺天然倪迂筆寫出溪山景以君冲  
澹懷共此幽棲境行歌歸去來踏壁發深省此則少作之絕近  
韋柳者也又和單協唐先生冬夜觀月韻云萬古清輝爛玉盤  
連宵喜得與君看青天碧海霜威肅只覺嫦娥不畏寒

湯明經啓甲原名丙熊字少華工律賦吾邑昭明太子讀書臺  
詠之者多矣君五言排律一首尤落落詞高可追唐格云遺址

追梁代靈光獨巋然高臺珍翰墨文藻映山川金粉南朝麗綵  
紉胄子傳梅飛飄講席藤老給書箋風雅推前哲師儒啓後賢  
吟魂猶髣髴濤捲澗松圓前八句寫題正面後四句見得在虞  
山之麓游文書院內仍能挽住讀書綽有餘地

席文學銜原名春帆字豈凡號倚雲貧老寄居蕩口華秋漁溯  
源家詩稿亦在焉豪於飲得句云壺貯乾坤開日月胸涵江海  
起濤灑和塞外秋柳云邊風蕭索最堪憐舞捲黃沙八月天青  
冢愁牽千縷月白山寒牧一林煙歸來皓首枝誰贈瘦去長眉  
畫不妍毳幕旃牆休問訊數聲羌管又殘年五六卽分承三四  
律法殊佳又嘗限君字韻賦落梅云此後月明誰伴我對句屢

改不愜後以詩示予予雖言其佳而心怦然驚爲悼亡之讖時代之對者五六人俱不稱意又以囑予辭不能固強之卽應聲曰向來雪霽每尋君滿座歎賞君竟用之不二年而其配陳

名源

字翰香工寫花鳥

謝世又二年而予婦亦亡其屬對不稱者無是苦也

且事後思之君初贅邑中陳氏予贅翁氏往來蹤迹略不以時正復相似蓋十四字無一虛設者嘗聞其誦先輩登虞山詩曰山色似龍常變化湖光如鶴欲飛來惜忘作者姓名附誌於此沈文學鼎字香郊寫意花卉姿致灑脫折竹詞二首云折竹竹折雙小作馬箠大作柳將軍醒臥不敢動寇來夜半聲邦邦折竹竹折高短作船釘長作篙瞿塘險惡鐵鹿斷上流打鼓官船

豪

張觀察燮字子和號蕘友乾隆五十八年庶常官至甯紹台道  
卒於任下筆纒纒千言平和雅暢嘗見予詩文而賞之欲挈之  
北上因親老辭之然不能忘知己之感也味徑書屋詩甚富其  
孫蓉鏡屬爲選定爰采錄之陋俗云天地生衆人各使食其力  
男當勤耕耘女當務蠶織幼習長不遷庶可無邪慝如何大道  
旁貧民失其職惟知競錐刀又復傭貨殖兒女纒扶牀先令學  
乞食再拜車馬前坦然無所惡及其六七齡謀利驅益急傅粉  
兼塗朱衣服強妝飾拍板彈琵琶獻笑征人側一錢一曲歌持  
歸意殊得纒屈二八年墮落更可憫男供戲弄具女人煙花域

業不隸四民苦乃逾六極論其父母心罪直浮盜賊吾願良有  
司平時早約飭先爲謀生全次與解蔽惑其敢終不悛執法投  
有北匪人或引誘尤當重誅殛庶幾革澆風羞惡完天則寄黃  
蕘圃同年丕烈云吾邑藏書甲天下前有汲古後述古零編斷  
帙徧人間百年價重雞林賈汲古主人小毛公假蹇適丁明運  
終斥賣膏腴事梨棗素封轉眼金錢空其時朝廷議加餉按畝  
誅求同剽掠先生無田但有書隱湖觴詠全高尙聞風述古錢  
遵王簪紱承家門祚昌弱齡挾策走槐市歸來破產購緹緗裝  
潢能沿宋人法覆之古錦扁檀匣護持不化絳雲灰室比曹倉  
架如鄴流風餘韻近何如我幼猶看共買書不惜揮金酬祕本

還教錄副集鈔胥到今大半高閣置人不好書專好利寒士耽  
書欺少錢富翁多錢不識字閒聞一二驚虛名南面居然擁百  
城緘滕扁鐻作家寶此厄更甚燒秦嬴吾生書癖消錢癖卅年  
積買八千冊飢寒難當飯兼衣磨耗精神髮且白恰有同心江  
夏黃片函苟古必收藏郭京易每舉其正束皙詩能補厥亡吳  
人愛花復愛酒否亦聲華競馳走君獨條然抱一編世味紛華  
不能誘昔人著作有本原心所得處形爲言騰寫類函鈔韻府  
流傳謬種尤紛繁六經可見聖人意諸史能知古今事立言貴  
有益於時率爾操觚等遊戲批風抹月誨邪淫側調么絃亂正  
音字作史皇鬼夜哭早知流弊癩人心管窺那得知全豹下筆

須根忠與孝不用詞壇負盛名開來繼往持風教邇來小說重  
虞初狐穴蛇牀競別梳合召六丁炎火界枝辭一例痛刪除百  
年鼎鼎去如電不幸方以文章見君今降格作才人百斛珠宜  
寡一線我將乞養返東吳願君數游尙父湖筆牀茶竈擊輕舫  
何減西園雅集圖君善注經我注史休問人閒金與紫一卷書  
輕萬戶侯磨鉛握槩從茲始又嘗見一印章云平生減產爲收  
書三十年來萬卷餘寄語兒孫勤雜誦莫令棄擲飽蟬魚藁友  
氏識共三十二字其家藏書多用爲印記又取司書之義命其  
長孫小名曰長恩卽今蓉鏡也亦喜收書每屬予題跋可謂繩  
其祖武者矣

黃大令泰字韻山乾隆五十九年順天鄉舉知閬中縣急流勇  
退詩畫自娛題釣海圖云海中心風景吾眼前三日曾走程四千

自註戊申在閬迫於試期泛海歸  
里自五虎門開行三日抵乍浦

白波如山擁靈怪險絕詎能

安釣船小視塵寰若浮蠹千載豪稱任公子五十簪餌坐投竿  
不得大魚心不死莊生放言十一真後世乃有同心人手劔大  
木踏身上乘風欲溯銀河津才人文筆光星斗壯往奇情更無  
偶甯隨煙雨鯤鷗飛不逐芻茭牛馬走小儒釣名印懸肘貪夫  
釣利金在手雄心灑氣薄雲天天水茫茫竟何有持竿苦倦歸  
則那勿舒長嘯驚黿鼉繩牀老屋著地穩清池曲沼容婆婆魚  
得不得尋常事但願年年海不波佳聯則靜坐云避俗翻成隱

投閒轉自豪譚孝女割股云萬不可愚惟有孝一無所愛乃知  
親潼關云一道河流天上落萬重山勢馬前分

嚴孝廉本中字位之乾隆五十九年舉人著有松崖小稿雜感  
云開戶見明月悠然移我情我情在泉石脫略簪與纓簪纓非  
不美寵辱令人驚况乏經世具非分敢趨營又庭中有嘉樹去  
春猶發榮螻蛄穴其腹葉凋本亦傾此身非金石萬事勞其形  
溘焉朝露至智勇奚能爭北邙冢壘壘不辨陳人名又人生如  
寄客何物爲吾有百年亦須臾况無百年壽及時且爲歡言告  
同心友飲我手中杯勿論旨與否冥冥長夜人八珍不入口達  
生洵非狂拂衣躡莊叟又愚者嗜貨利終身抱沈痾早暮勞持

籌九死猶未悟燕雀爭餘粒黃鵠去不顧飄然天地閒誰能識  
其故此可謂善學十九首矣

唐孝廉亮字耕陽號麗農學傅師也乾隆五十九年舉人一上  
春官卽杜門伏處家在北范村三十年不入城市好老氏之書  
藥鑑經卷外一切夷然不理常州有兄弟爭產者兄以重利昭  
先生句爲訟牒怒叱之且責以大義其人鼠竄去竟息訟此學  
傅親見尤近日所難得也詩文尙清華駘宕記其蒲劍一絕云  
英雄氣概提三尺儒雅風流仗一揮何似青青藏澗底無鋒能  
斬萬魔圍題學傅亡婦玉花閣遺草後云名媛如名士爭名競  
託詩幾人能自悔夫子尙難知孝養言無閒操家病可悲後堂

兒婦集說與仰闈儀此吾師絕筆也

邵文學大銓號師竹年六十四其配毛卒曾刊悼亡絕句小冊

摘錄二章云夢魂幾度返門庭旅舍眠餐刻不甯戶外麻旗堂

內幕分明去歲意中形

自注去年應試金陵妻方病篤

明知百歲有窮期才愧

安仁作誄辭我亦從今生趣澹與卿離別幾多時一寫預兆一

是老年悼亡

席上舍世楫字維岳家釣渚和錢梅溪移居翁家莊詩有云莫

將清福看如躡好去紅塵息此肩梅溪故好遠遊者誦之不勝

擊節惜餘詩皆佚

趙文學元紹字孟淵才氣英銳惜不永年天龍泉一絕云寒碧

澄潭斂衆山倒影深潺潺流不歇風雨和龍吟山深夏亦寒人  
靜山逾綠清泉瑩我心太古一涵玉按此卽讀書天龍菴時作  
也

席上舍仲甫號補齋居釣渚喜談諧愛賓客畫宗石谷派嘉慶  
庚申夏日課二尺許紙一幅滿十紙則囑予題之以得人持去  
爲樂蓋胸襟絕去鄙吝者詩亦多畫意秋蘆云白露爲霜候花  
飛兩岸蘆無心迎客棹何意老江湖浩渺寒波靜蒼茫野月孤  
風回聲淅淅驚起釣魚徒秋蠶云依舊桑麻地秋來復育蠶繭  
成真有八眠候又看三爲急寒衣計頻勞少婦探纜聲連絡緯  
此意竟誰諳予嘗有途中詩云誰家秀士態翩翩揮手林塘落

照前水面蓼花紅不定竹篙撐過賣書船君愛之遽爲圖諸紙  
筵旣而筵敝又圖以見贈雅趣如此又記其喜雨有民樂勝於  
懷趙璧天憐何必雨秦金之聯殊警策云

毛上舍琛字寶之號俟盒少孤有詩癖母夫人潘命游王東澱  
之門力追唐軌初在揚州作紅橋詩有云鐘聲不醒繁華夢夜  
夜紅樓度玉簫傳誦一時晚游嶺外賦木棉四律爲黎二樵簡  
所推重放舟焦山中流風雨大作悵然迴櫂一首云焦山青寥  
寥東望挹朝爽勝游信歸篷江流動雙槳遙指空翠中已作凌  
雲想林嵐映澄瀾風鐘答清響蕭蕭楚雨來漠漠春煙上敢嗟  
賦命薄怯冒波濤往醜酒謝屏翳題詩倡吾黨佳處留茅庵何

年脫塵鞅清遠峽山寺和伊墨卿太守韻云峽雲溼不飛峽水  
清見底客夢水雲中朝隨白鷗起長揖二禹君玉貌颯然喜不  
知讀何書富貴一做屣歲月曾幾何重來吾老矣阮俞安可求  
野菊破霜藥春興云春到潭州不是春春寒如水雨如塵故宮  
賸有埋香土舊井今非賦鵬人不信風波隨處有斷無櫻筍及  
時新愁心寄與江南月照我天涯鬢似銀無花無酒一春殘去  
更飄零住亦難屈宋至今文藻盡瀟湘且作畫圖看突黔未免  
因人熱裘做誰禁徹骨寒猶有故交憐寂寞肯遺書札勸加餐  
紅梅云酒暈嫣然上玉肌北枝香冷得春遲飽經冰雪渾無恙  
纔染燕支便入時絳帕蒙頭高格調緋衣稱體好丰姿孤山處

士今衰老卻愛紅兒是可兒小桃分豔壓春寒耐得筵前醉眼  
看修竹可無紅袖倚曉霞知有道人餐當歌依約朱櫻破落地  
分明絳雪殘生怕江樓吹玉笛綵綃新翦護花旛皆風致清雅  
其全集已佚既錄三首復就師荔扉所鐫小停雲館芝言中增

錄三首

楊文學文鐫字雅亭太倉人教讀吾邑之朱堰塘家焉其友顧  
孝廉召春囑予點定詩集因摘錄之古昇仙臺云出世成仙人  
入世卽孝子庸行本無奇立極有如是譬如登高處必自平地  
始嗟予常浪游菽水猶無似悠然望白雲感涕不能止寄內云  
生怕歸來重又別須知不是不歸來辭意尤悽惻

錢女士珍字溫如長洲人編修中諧之玄孫女家世能詩歸吾  
邑屈竹田別駕孝敬有禮以婉難早卒有小玉蘭堂遺草冬夜  
云聯吟忘夜永鐘漏報深更紙帳和霜冷寒燈借雪明梅香清  
鶴夢竹韻亂茶聲不是乘吟興書難呵凍成

海虞詩話卷十一

單學傅師白輯

張上舍焜字錫蕃號秋樵爲蕘友觀察之同祖弟居翁家莊予  
搜國初至今邑西境之刻詩稿者不多得秋樵所著香畦草堂  
詩令嗣定基特鐫以行世秋樵於是不死矣邀月云明月如佳  
客寒齋屢夕過多情秋獨此相對夜如何徙倚臨虛幌光輝映  
翠蘿不教傷寂寞終歲見時多落花云自信有香原足貴可憐  
無力尙能飛秋夜納涼云風細卻吹癯骨爽月明偏照別情多  
皆佳

吳文學炳詔字鳳銜雨後云詩筆經秋老詩心秋更清微雲千

片溼新月一彎明骨瘦涼先覺愁多夢未成牆陰苔蘚茂不斷  
是蛩聲

蔣大令因培字伯生明忠烈公欽之後才幹英敏歷知滕縣汶  
上泰安齊河等縣嘉慶丙子清查庫項幾罹大辟遣戍新疆逾  
年乃釋歸論交當世名士數十年遨遊南北徧干當路年逾六  
十始歸在靈公殿右增構園池爲娛老計又於致道觀西築一  
角園奉忠烈公像兼爲衍賓之所吟嘯酣嬉其詩善搜題情如  
海東青之擊天鵝上盤下搏無或失全稿尙未梓行嘗見扇頭  
三詩錄存之讀唐書李昭德傳云紫虛紫帳升妖狐鸞臺出入  
多庸奴就中稍喜李昭德祀姑一語安皇儲豈知晚節翻乖刺

宰相行軍受人撻平時鼻息可衝天俯首兇僧氣全奪卻憶同  
官田舍翁不拭唾面將毋同苟容忍辱徒爲耳朝見南賓暮東  
市君不見廣平庭下立昌宗幾欲腦裂蓮花容鐵石何害功名  
終抵都適張子白新成進士偕令弟遠春走訪小飲口占贈之  
云到及泥金挂壁時九衢猶見步遲遲不爲東野看花態得意  
春風馬不知兩三知己隔關河奈此青州從事何今日一傾三  
百斛果然燕市酒徒多又題徐侯齋山水立軸云風景依稀澗  
上村高人筆墨淡無痕山中不要軒車訪只許白雲時到門此  
軸今藏張芙川家予亦有題詠

張布衣榮字漱石有漱石詩草雜詩云短綆莫汲深瘦驢難致

遠此理婦穉諳臨事昧分辨蓬壺境何杳跬步輒思踐李杜詩  
何高追樵忘才淺孜孜到白頭竊憂徒負覩不若且逍遙大化  
任流轉或曰舜何人有志且自勉龍興必借雲蠶老自成繭遊  
仙云碧城縹緲賦歸來卻被壺公笑不才何用浮槎行萬里壺  
盧中有好蓬萊詠梅云信有美人甘淡泊斷無高士愛繁華思  
致俱甚靈妙子方齡字黼堂有小石詩草年甫冠卒

單文學繼盛號友石居釣洛博涉詩書通道家言喜院本說部  
生徒脩脯悉準酒資罕飽煖之日無憂戚之時詩詞曲三者皆  
工脫稿輒任人攜去學傅僅有其友石道人歌一首序云書示  
師白大姪聊解詩淫之謂也友石道人和其光短髻方頰眉清

揚披鶴氅冠華陽自疑謫下白雲鄉道號三癡子十年求道坐  
面牆忽欲東航渡弱水西駕踰崑岡尋訪偷桃兒同侍阿母傍  
芒鞋幾緇走且偃久之無所得歸來偃戶蹲匡牀還我書篋與  
琴囊棋一枰畫一方券除酒醺燒香妻操井臼兒讀騷莊懶荷  
耒而躬耕薄握算之行商不束縛於利鎖名縲不怨夏無葛冬  
無裳不愁廚無薪甕無糧目不識七青八黃口不談此短彼長  
不知宇宙大不管烏兔忙喜怒不形色物我俱相忘但愛覓句  
搜枯腸朝吟撫孤松夕詠倚修篁當其得意時拍手呼嘯頭昂  
昂或謂魯儒迂或譏楚客狂道人不介意呶噉出吻不絕如絲  
簧造境超九霄遊神窮八荒景物偶寓目刻劃盡形相妄意追

李杜萬丈分光芒漫詫牛渚犀萬怪難逃藏或嬌若花吐或倩  
若女妝或珠華的皜或雲態飛揚和或扇春風淒或嘒秋蜚瘦  
或峭壁立爛或錦機張險破厲鬼膽凜挾嚴冬霜不怕俗耳驚  
不顧時眼眙只恐天驚石破帝盛怒不許狡獪摘詞章因而朝  
朝稽首奏昊蒼臣才天賦天豈戕小臣無大罪勿遭文字殃上  
天憐其窮特命作歌自訟將罪償道人此際情洋洋從今騁藝  
圃戰詞場抽祕思傾文箱詩膽大於天落筆無驚恇招取盧仝  
李賀輩和我此曲千載歡徜徉纏纏四百餘言神逼玉川荒幻  
卻有實理學傅先有夜泊尚父湖詩後姚旨雋有嚶語詩亡婦  
翁氏品爲虞山一時三詩怪云

屈副貢培基字元安閒以字行嘉慶三年試順天闈對策該博以引用闈百詩姓氏違式僅中副車性高潔篆刻私印古雅軼倫嘗見其題汪東山秋影樓詩集二絕云少年跌宕賦長楊第一仙人占御香一自雪兒歌斷後春風誰唱小秦王當時月照聚奎堂三歎焦桐意惋傷拔得東坡足千古平生愛士繼歐陽

自註查初白登進士爲先生所薦

此乾隆戊申自書舊詩蓋少作也而精警已

見矣

楊員外景仁字育之號靜巖家恬莊年十三試弱冠弄柔翰題有云年方逾舞象技豈學雕蟲邑令以大器目之嘉慶三年順天舉人官至刑部員外郎在京供職有年歸田後著籌濟編詳

考荒政詩亦清華朗暢東城乾麵衙衙家方伯長桂舊第戊午  
歲張子和比部招景仁寓廳事西徧槐陰滿庭紫藤蔥蒨讀書  
之暇吟玩欣然比丁卯夏訪曾勉耘先生重至庭柯如昨肆誦  
不殊輒呈律句竭來重訪讀書堂小閣依然雒誦忙藤架猶留

前度碧槐花又值此時黃

自註戊午初秋與鏃秋樓范石渠程  
星宇陸采山家質堂弟會文於此迄

今年矣 一枝細檢巢痕在三宿重尋夢境長最是當年辛苦地宵

燈頻燂未能忘中州作宰著民功需次重來踏輦紅鷓羽共欣

棲鴈塔鳳毛早看翥螭宮

自註勉耘官豫兄弟  
皆成進士于又鄉舉

益儲循吏通經

用依舊書生講藝同回首芸窗懷故字絳帷還喜坐春風

屈副貢振鏞字聲九號雲峯嘉慶五年鄉試副榜自序謂生平

無他嗜好喜讀未見書其未經刊刻而可傳者輒手鈔成帙共  
得數十種與人交無損人利己之心有濟困扶危之意苟可援  
手無不爲之竭力亦不責報此可自信者其韻語得長洲孝廉  
李繩切磋而益工李爲歸愚宗伯入室弟子故雲峯詩草端正  
有法度絕交行云古人結交惟結心今人結交須黃金黃金既  
盡交亦盡黃金不多交不深我無季倫百萬富焉能酒食游戲  
相追尋掉頭揮手謝鄉邑願隨鹿豕同朝夕寄語悠悠世俗人  
君自乘車我戴笠他日相逢莫相捐雜詩二首云人生自有寶  
所寶非珠玉胡爲玩物者搜羅日不足始作奇貨居繼求善價  
鬻真贗辨毫芒低昂任反覆假託嗜古名巧構趨時局利心一

牽引輾轉鑿難屬終歲爲誰忙流光如轉轂曷不反已求超然  
邁塵俗又人生天地閒總被浮名誤虛名苟不成實學安足數  
因有干謁門乞憐向昏暮低頭何顏色千金買一願安家沒字  
碑齊相執鞭御得意時自鳴千載倖一遇明珠蘊滄海良玉藏  
山塢過者歎不材棄擲如糞土三詩議論具見警策佳句如登  
金山云去帆乘海信飛鳥出江煙病骨云怯風兼避日減帶卻  
添衣游清涼寺云江流長浩蕩山色自清涼深居云去鳥有時  
盡落花終日閒東湖墓云汗史姓名慚弟子殯宮樵牧任兒孫  
淮陰侯云垂死卻令思蒯徹此生真悔識蕭何冬夜云已分年  
年常作客何妨事事不如人西湖晚眺云雲裏松篁三竺寺水

邊花柳六橋船傳觴云一蕉量比東坡小百戰聲驚北海狂其  
矜嚴高亮幾可颯響沈宗伯也又如閩中雜詠簪花云插鬢尙  
含朝露重傍人潛覺暗香移添香云佛號口傳燈未炷琴絃手  
撥曲難終觀書云文章未許留脂粉巾幗何妨對聖賢亦自工  
穩與作豔體而徒逞尖薄者異矣

景大令燮字閻仙東亭觀察子嘉慶三年舉人知繁昌縣丁母  
憂服闋調海澄縣著有嘯餘詩鈔未之見也僅得其去任詩云  
春穀周郎治化神兩年寄迹示前因江山自昔稱雄壯風俗於  
今著樸淳勝地偶探題拙句官齋有暇接文人家聲舊本傳清  
白敢飲貪泉辱我親臨知文字講陳編稍解醫經藥浪傳典去

風塵垂做篋收來珠玉贈行篇輕裝共諒餘雙屐介節終慚選  
一錢底事得歸歸又悵與邦人士慣周旋詩本四首此其一其  
四也姚旨雋與君本無瓜葛然極詆此詩知予亦素無瓜葛特  
錄二首隱名以求予品隲予謂似隨園詩話中佳作歎賞累日  
後每遇旨雋必問作者姓名兩年始見告旨雋終不服予終謂  
佳作也又團扇曲云團團合歡扇皎皎如明月妾不能乘明月  
去夜夜與君訴離別妾尙能將團扇寄時刻爲君滌煩熱妾心  
潔白明月光妾意纏綿團扇藏吟將織錦詩千首寫上珍珠字  
幾行今日團扇爲妾寶明日團扇入君抱君但看此扇便如覩  
妾面君但搖此扇便如妾眷戀秋來縱使涼風起莫便棄捐筥

篋裏君看明月照君前萬古清輝總在天興與古會矣

董文學金章字紫綬性沈靜記其登孫氏大石山房云綠陰層  
疊趁幽攀蠟屐衝開薜色斑大石至今臨老屋高人從古愛青  
山茶煙影裏清泉瀉樵唱聲中夕照閒俯視滿城樓閣好辛峯  
缺處一僧還第四句最佳

毛上舍晉昭字蔗坪好出遊能畫移居詩有琴絃三撫忘流水  
之句自注云乾隆己酉自鄉遷於琴川之第五絃嘉慶庚申又  
遷第一絃戊辰又遷第四絃凡三遷皆在琴川上豈所謂志在  
流水者耶所刊鷗閒草詩派近王柳南題畫菊云空齋何患有  
催租閒把吟情託畫圖一別晚香嗟隔歲捲簾看我更清臞意

致殊佳元夜云積雨幾忘春有腳踏燈剛見月當頭亦佳

席太史煜字子淵號松野嘉慶六年二甲第一名進士官編修以在史館撰和珅傳忤旨落職中壽卒少落拓文藝皆不甚留意而出手卽工所嗜獨音律書法尤新媚題朱蕤湄詠史百律詩册云史家備論贊例自馬班始詩人尙美刺國風最綺靡兩者合爲一遂號爲詩史去者日已遠來者日已詭嗜飲餒糟粕得食饜穠秕流覽乙部書綆短不及底道聽而塗說倏如風過耳否或獵辭華文囿竄同雉縱有倚馬才不過雕蟲技寥寥著作家屈指幾人是明經朱蕤湄吾鄉老名士腹內貯千秋目中無餘子廿年載折節貫串有條理視猶掌上紋得失可歷指上

溯秦以來下訖勝國止百篇著新詠鑿戒示微旨誰攜燕地來  
君家阮千里謂華授予雒誦之胸次快如洗隱含美刺情雅合  
論贊體論世綜三長才學識備矣方諸古作者何必不相似他  
日從君學讀書究源委原作有寬衍處僭爲刪薙而存之因未  
見專集他無可采耳

曾大令涉字牧庭勉耘之弟嘉慶六年進士知河南鎮平縣和  
易質直無分外之慕辛酉京邸紀雨云冀方土高燥風沙日飛  
揚偶然值陰雨灑地如瓊漿誰知今年來天道忽變常自春及  
夏半不雨憂亢陽伏陰深祕結積久勢乃張虺虺輕雷迅冥冥  
毒霧颺黑雲迷朝昏一雨不復暘初疑天柱折半空瀉銀潢又

恐日車翻晦暝水入箱連縣二三句時時一溯滂破屋八九間  
湍水奔中堂堂前成巨浸左右無堅牆滿屋氣蒸溼漏滴頻移  
牀棖棟幸未傾支撐費周章苟得全身命不敢怨穹蒼卻嗟九  
門外一望皆汪洋比屋千萬戶隨波去湯湯死者無骸骨存者  
無糟糠造物本仁愛胡降此奇殃仰觀仍黯慘天意豈可量安  
得一開霽復覩日月光按此爲嘉慶六年紀實之詩餘如詠茶  
云自是淡中偏覺厚每從苦後始知甘五十初度云新書欲上  
長沙策舊業惟餘大令氈皆雅飭

蘇布衣孫瞻字耕虞號耐寒以畫名邑中漢陽方深柳璣謂其  
題畫詩似田水月同邑許紅橋朝序其詩則摘佳句如烏語寒

煙外人行古木中。黃花影瘦宜明月。紅葉聲多爲早霜。以爲卽  
詩卽畫。予謂卜居後書懷二律尤有情味。云五年浪迹似萍蘋。  
遊倦仍歸語水濱。千里雲山溫舊夢。一庭風月穩閒身。筍蔬分  
味供佳客。菽水謀歡侍老親。守此硯田甘澹泊。何愁破甑欲生  
塵。人如大海一浮蘋。泛泛隨波向水濱。一葉輕舟曾寄迹。三閒  
破屋僅容身。月如有約常爲侶。花縱無言儘可親。但得安閒貧  
亦好不。求衣食走風塵。湖田外史題辭有三復卜居詩之語卽  
此也。

丁布衣杰字省菴。福海觀潮云。極目海門遙。微茫水氣驕。怒飛  
雲影合。高捲雪花消。鼓角鳴屯戍。帆檣點泐寥。何須枚乘筆。能

寫廣陵潮順風渡洞庭湖云濤聲盡向船頭起山勢疑從艣背  
生秋雲云人情莫學伊輕薄轉眼風吹賸碧天

程文學梓誥字瑤波居東徐市性疏豁喜詩詞七律細膩清微  
最擅勝場嘗囑予點定詩集愛其妙莊涇船坊歌云公然是屋  
形卻只存屋意上既不見天下又絕無地出入惟憑一水通船  
去亦招鵝鴨至或蓋瓦或苫茅張簾混篷箸支柱疑木篙檐角  
參差覆楊柳梁頭長短懸桔槔此閒水國近華蕩但見縱橫船  
來往縱者才出浜橫者又出港不是鬻泥又竹竿定是撈蝦撒  
絲網侵晨撐去暮撐歸聲聲款乃歌斜暉歛聽舫聲戛然止認  
得船坊此其是倒拖船尾進遲遲輕搖不使眠鷗知坊空連日

無船住知往城中糶麥去玲瓏變動水村景像宛畫目前吳枚  
盃翌鳳選入叩須集他如詠苔云花亦能開偏似米春曾未買  
枉拋錢詠鴈云爲客頻年無定主稱臣何日始逢君壺盧云酒  
原可貯腰何細書卽曾藏腹究空送秋云平生腰骨因君瘦向  
後風霜奈我寒懷家人云不辭攜手常兼婢自忍飢腸獨飯兒  
春草云願化合歡供樹背輒憑相鬪趁爭心皆非粗豪人所能  
言也殘冬小集有仙亦無奇只是頑句處境可知矣

陳文學錫桂字蘂仙家東徐市少年警敏惜不永年雜言云西  
漢文帝時人獻千里馬下詔親卻之風聲動朝野我思文帝年  
烽煙數擾邊將軍善騎射才氣銳無前顧此千里馬與之良有

緣帝不受獻馬去矣北平太守心茫然馮唐乘閒直言諷雖得  
廉牧弗能用讀書云同讀一卷書心各領其要同解一書理用  
各隨其妙什伯千萬人無一或相肖人各有一心心各有其竅  
卽以一己論壯便不如少往日得心處今日思之笑今日得心  
處必遺後日誚一己且無定他人詎可料苟不詭於理雖異亦  
同調又但讀不如看但看不如思思之不能得還當姑舍之偶  
於游覽處或在默坐時不召而自來暗中疑有司嗚呼天下事  
大抵皆如斯又徒步出門去道逢油碧車云是貴官人其初亦  
窮廬讀書早宦達功成林下居私心竊豔之謂我胡不如歸來  
憬然悟此事甚于余茫茫大千世立身自有餘心苟慕乎外已

非真讀書靈通活變說事精實可與趙甌北之作並驅

陸布衣去牖字藥亭患咯血病早卒排悶云病累親憂敢自寬  
蕭條景物更相干昨宵雨向風前急今日風因雨後寒蟲語砌  
閒驚歲促菊香籬下認秋殘關情諸弟牀前話莫作閒談一樣  
看蓋自知不起矣又病劇云病骨漸無生意詩囊惟有淚洩  
瀾

僧行遠字蒼巖喜寫竹能詩玉蘭云玉立亭亭無半語素心一  
片對空王胸次可知也獨坐云獨坐無聊且聽風小橋流水鼓  
琴同分明字句天然調不在絃中與指中題畫云翠竹蒼松古  
澗頭茅亭有客共悠悠未知相對緣何事坐斷煙霞不計秋

鮑女士印字尊古適邵孝廉廣融題趙甌北詩集云先生才足  
高千古下筆如龍復如虎九天珠玉咳唾成無縫天衣不須補  
拜袁哭蔣尙未然餘論紛紜何足數先生得名不知榮先生作  
詩不知苦但覺山水秀靈氣取之無礙任我取詞源浩湧翻水  
瓶才思捷打催花鼓讀之未竟更漏盡燭花紅焰爲詩吐先生  
先生詩必傳今之甌北古老杜甌北集有和韻一作此亦附載  
因其集無鐫本故錄之

陸女士芝字靜娥題秋山雨霽圖云山草萋萋山葉黃山中一  
雨亂泉忙數椽茅屋無人住只有秋聲送夕陽或云著有媚愁  
小草惜未之見夫族亦未能詳也

季女士瑞貞字靜玉景園仙大令配也著有繡餘詩鈔舟至金山云鴈門指魏峨嵋海望絲互官齋奉慈顏聯吟助佳興花明畫捲簾葉落秋開徑唱酬頗不疲刻畫殆無賸所嫌眼界窄未及履名勝昨從長江來私意喜得稱黃州過赤壁蘇賦略可證馬當著奇險懸崖黝如甌小姑配彭郎妝成最明靚霧氣晨迷濛霞光夕掩映天心月到時團圓啓雙鏡江山妙如此歷歷待題詠奈何行兩月老母日抱病良藥固攜帶陳方孰改定一燈照不眠憂心夜恹恹今朝風日喧片帆懸且正鐵甕露城郭金山響鐘磬母病稍可支扶向船窗凭臨流發長吟愁懷聊一罄靈石縣道中云孤城一角暮煙迷亂石縱橫踈馬蹏出寺鐘浮

濃樹杪穿雲日落遠峯西遲遲晴書征人倦杳杳長途斥埃低  
回首鴈門春色好小桃花發鳥初噉闔仙書至率成一律云昨  
夜書傳未一句行行細字慰離人老親健飯真爲福諸弟能文  
豈患貧鄉國友朋情洽否故園臺榭夢來頻客途珍重思何極

回首秦關淚滿巾